



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tir_yimym

yt tir yimym

TAPAK 7

ICC Men's Player of the month
atema Bumrah nominate süogo

Yunus-i nùbur jenti takum
samatsür: Sheikh Hasina



VOL. XXII ISSUE NO. 57 (ADOK 57) DIMAPUR ROGONÜ (FRIDAY) LUCHII (DECEMBER) 06, 2024 ₹ 5.00

Hornbill Festival mapang mürekmejuba PM Modi-i tushi

Dimapur, Luchii/December 05 (TYO): Naga Heritage Village, Kisama nung tang temongdak Hornbill Festival nung jana-reja ketdangsüba atema Ato Kilonser Narendra Modi-i Nagaland nem tenüngsang agütsü.

Social media X nung ato kilonseri iba benjongmung tenzüker küm 25 alizüing tongtetba asoshi Nagaland nung aliba nùburtem salem lemsatapa liasü.

Küm ishika tejakdang pai iba benjongmung semdangba bilemteta, Hornbill Festival ya Naga nunger sobaliba aser yimsü-yimpong sayuba lir, ta PM Modi-i ashi aser nisung ajung dang iba benjongmung nung shilem agitsü ajungshia liasü.

Ato kilonseri state mürekmeju maparen balala inyakba ajitetba ya sobaliba benjongmung mapang libajen asoshi bilemba inyakba temaitsü lir.

Dr. SC Jamir aser Aotsür anema o tamajung zülusang pua lir

Dimapur, Luchii/December 05 (TYO): "The Patriotic Nagas" Facebook Page nung Dr. SC Jamir aser Ao tsür anema tai aputsüsa o züluba dak sendakba nung ken o ka Cyber Crime Police Station, PHQ Nagaland nung züluk, ta Nagaland Police sangdong ka ajanga ashi.

Bushistüingdangba mapang iba post zülusang ya jangjatet aser Delhi nung November 30, 2024 nü Nagaland Police ajanga pua

Nagaland-i bener arur tang Judicial Custody nung lir, ta ashi.

Iba ken o dak sendakba maneni bushistüingdang sutar aser forensic kuli tem bendenba mapang lir. Ozüing agi melaba ama iba ken o tajungtiba nung tembangtsü, anungji nùburtem dang State nung tensa tamajungba mekumdahtsü süngjema alitsü ayongzüker, ta Nagaland Police sangdong ajangasa ashi.

25th Hornbill Festival nung adener nisung 90,000 tajunger

Kohima, Luchii/December 05 (TYO): Tang temungdang 25th Hornbill Festival tenzüker mezüing anogo pongu nung bendanger densema nisung 90,000 jungnüai Naga Heritage Village, Kisama semdanga liasü.

Bendanger 1715, domestic tourist 22,546 aser locals 62,379 densema nisung 86,640-i Kisama semdangogo, ta Joint Director, Tourism Department, Toka E. Tuccumi-i ashi.

Item rongnung iba benjongmung tenzüker anogo nisung 23,910 aru aser pezünü buba nung tajemba, 14,502 liasü.

Department ajanga anogoshi iba tesem semdang indang osang agütsüba nungya mezüing anogo nisung 23,910, tananü nisung 17,588, tasemnü 16,087,

pezünü nisung 14,502 aser pongunü nisung 14,553 liasü.

Iba benjongmung tenzüker pongunü buba anepdang Department of Art and Culture ajanga "Cultural Connect" omen nung ajemdaker sobaliba dak sendakba sentong ayongzükerba nung kin 18 nungi shilem balala agia liasü.

Taküm iba benjongmung nung partner states tem rongnungi Sikkim nungia iba anogo par sobaliba sayua liasü.

Kisama nung sobaliba saya balala aser indigenous games aliba den külemi nùburtemi Kohima Night Carnival nung kanga sabua shilem agir, koba Kohima Chamber of Commerce & Industries ajanga Kohima jila tiyong aser tesem balala nung ayongzüker.

Ao Senden-i VK Town-Doyang lenmang semdang



Ao Senden, Mokokchung Town Lanur Telongjem aser PWD (NH), Mokokchung Division ketdangsür temi December 5, 2024 nü NH 61 (VK Town-Doyang stretch) semdangba sülen tangokba noksa nung angur.

Dimapur, Luchii/December 05 (TYO): National Highway 61 nung VK Town-Doyang tsüingta lenmang yanglushitsü asoshi state sorkar nem Ao Senden ajanga ano 30 agütsüba December 4 nü tembangba sülen Ao Senden ketdangsürtem den PWD (NH) Mokokchung Division nungi ketdangsürtemi December 5, 2024 nü iba tesem tsüingdong oa semdanga liasü.

Ao Senden ketdangsür ya meina Ao Lanur Telongjem (ALT) nungi ketdangpurtem oa liasü.

Iba mapang PWD (NH) nungi ketdangsürtemi Ao Senden aser ALT ketdangsürtem dang akok tashi tajungtiba nung parnoki lenmang yanglushiogo ta ashi. Ajisiüka iba lenmang yanglutsü asoshi contractor ka nem nungloktsüogo aser 'two-lane' lenmang ya kobi melie yanglu

tenzüksü ta ashi.

Ao Senden ajanga October 29, 2024 nü Deputy Chief Minister & Minister in-charge, National Highway, Nagaland nem tezüluba nung takhangba ka agütsüba nung NH-61 (VK Town-Doyang stretch) ya tekeratiba nung PWD (National Highways) nem yanglushidaktsütsü ashi aser tang atema mera ka ama anogo 30 tsüingta iba lenmang nung gari senzütsüsa yanglushiang ta ashiba mapang November 27, 2024 nü tembanga liasü.

Iba sülen parnoki züingzütsüba anogo tatem nung Ao Senden-i lenmang semdangi aodang PWD (NH) ajanga mapang atsülangtsütsü mepishi aser mapang atsülangtsüba ya December 4, 2024 nü tembang. Parnoki iba lenmang

semdangba sülen Ao Senden ketdangpuri PWD (NH) dang temulung agüja lenmang yanglushiba mapa inyaktsü aser nùburtem mapang ajak nung anisüingzüka senzütsütsüsa yanglutsü ajungshia liasü.

Iba dak alia lenmang yangluba maparen kodanga anüalema meinyaktsüla ta ashi aser two-lane lenmang yangluba maparen tekeratiba nung tenzüksüla ta shia liasü.

Lenmang yanglushir alidak lishi aser longsang agi lenmang tapok ateper aliba nung tzü aintsüla aser road-roller ajanga menüingtsüla, ta ALT ketdangsür temia ashi.

State nung NH 61 ya tongtipangtiba lenmangtem rongnung ka lir, koba ajanga state yimtiba Kohima den district aika sendakteper.

Chakhesang nunger sübosolemtsü kumdanga amshitsüla: CARB

Dimapur, Luchii/December 05 (TYO): Chakhesang Naga nunger indang sübosolemtsü aser azük-naro amala mashi lenmang nung mamshitsü Chakhesang Attire Regulatory Board (CARB) ajanga tekumdangtsü metetdaktisü.

Ozü tetsü-tebou senmangtem talisa pei sasa 'cultural ambassadors' nungja agütsür sobaliba ajungkettsü tenüing nung ozü sobaliba mashi lenmang nung amshir, anungji 'modernity' aser 'fashion'

tenüing nung ozü ayak mezüingmeshir nem tapet temerenshi agütsütsü, ta CARB sangdong ajanga ashi.

Akhi mapang nungi ozü sübosolemtsü aser azük-naro ya ozü 'autobiography' ka ama liasü, kong nisung mashi kati nisung ka takum jenjang pa/lai asemba sübosolemtsü nung dang ajitetba liasü, anungji akumtsübo mesüi ozü sobaliba mashi lenmang nung amshir anema tapet mera agitsü, ta ashi.

Artists temi ozü sobaliba

senmang akumtsüba temaba jenjangi ajungkettsütsü ajungshir aser designer tem dang akhi mapang nungi angazüktepa amshia arubatem masü saka pei sasa yanglua amshitsü ayongzüker, ta ashi.

Chakhesang weaves ya Geographical Indication (GI-542) agi wazüka yua lir, anungji ozü sübosolemtsü mashi lenmang nung amshir tem dak nungnanga melie ozüing agi melaba mera agitsü, ta CARB sangdong ajangasa ashi.

Hornbill Festival 2024: Cultural Extravaganza Day 5

Dimapur, Luchii/December 05 (TYO): Hornbill Festival 2024 tenzüker pongunü buba Department of Art & Culture ajanga Naga Heritage Village, Kisama nung ayongzükerba Cultural Extravaganza nung Sikkim nungi Integration Dance agi shilem agia Sikkim ya telungjem, tesunep aser tesüingjem linük ka ta sayua liasü.

Anepdang Cultural Extravaganza sentong nung Host ya Minister, Housing & Mechanical Engineering, P Bashangmongba Chang aser Co-Host ya Advisor, Fire & Emergency Services, Home Guard & Civil Defence, S. Kiusumew Yimchunger aser Chairman NIDC, Kvulo Lorin liasü.



Naga Heritage Village, Kisama nung 25th Hornbill Festival tenzüker December 5, 2024 nü Ao Cultural Troupe ajanga akhi mapang keyi asaba yimya sayuba noksa nung angur.

Iba sentong nung cultural troupes 18 nungi sobaliba tsüingsang aser ken ajanga shilem agi aser mezüingbuba nung Sumi Cultural Troupe ajanga AphiloKuwo (Warrior Dance), Sangtam Cultural Troupe Jümürü Mütsahba

Sapan (soap making) aser Pochury Cultural Troupe ajanga Hohidoh Hohidoh (folk song) agi shilem agia liasü.

Lotha Cultural Troupe-i Olehoo (action song), Phom Cultural Troupe-i Chingtempe (stilt walking) aser Konyak

Cultural Troupe-i Kham shupuHie Kham Kongpu/Moolao (log-drum pulling and beating) yimyattem sayua liasü.

Iba sülen Kachari Cultural Troup-i HablingDangbani (folk song), Yimkhiung Cultural Troupe-i Wochak Khüntong (alu

nung adenba ken) aser Zeliang Cultural Troupe ajanga commemorative performance agi shilem agi.

Tikhir Cultural Troupe-i PowPokkhin (folk song), Garo Cultural Troupe ajanga RongDea (stone lifting), aser Kuki Cultural Troup-i Zou-Lie Kon (folk dance), Angami Cultural Troup-i commemorative performance, Ao Cultural Troup-i keyi asaba yimya, Khiamniung Cultural Troupe-i Hang Tui (Friendship dance) sayua liasü.

Maneni Chakhesang Cultural Troupe-i Chüsü Hoo (folk song), Chang Cultural Troupe-i Chishok Lamshok (Dance & Song of Peace Treaty) aser Remgma Cultural Troupe-i Accu Kekawa (Indigenous Game) ajanga shilem agi.

6buba Nagaland Honey Bee Day mungogo



6buba Nagaland Honey Bee anogomung sentong nung tangokba noksa angur.

Dimapur, Luchii / December 5 (TYO): Nagaland Beekeeping & Honey Mission- i ayongzüka Brehostibarnü NBHM indang Multi Utility Centre nung 6buba Nagaland Honey Bee Day mungogo. Iba anogomung ya 'BeeZ vibes; Give bees a chance' omen nung ajemdaker munga liasü.

Sentong nung o jembiba mapang Chief Minister & Chairman, Investment Development Authority of Nagaland, Abu Metha-i, ninang mojitzü ya küm meyirejang aika nature-i agütsüba senti chiyongtsü ka ama züngshia arudar, ta ashi. Iba ya

chiyongtsü ka dang masü saka chiyongtsü khenyongi balaka ama züngshir aser iba ajanga temang nung tajangzüik balala agütsür, ta paisa shisem.

Pai ashiba agi, tetsü tebou mapang nungi ninang metsü aruba yimya ya mangaoka ayutsüla, ajita asünungdang iba ya taruba putui knowledge bank ka ama amshitetsü.

Nagaland nung ninang metsüa ninang mojitzü bendentsü asoshi lenmang sadema lapoka lir ta shia pai ninang tali metsüa mojitzü tali adokdaksütsü ajungshia liasü.

Manen Abu-i, social commerce venture

www.otipy.com den longjemer 'Nagaland Honey' shishilembatsü atema amenokja liasü.

Sentong nung Agriculture Production Commissioner & Mission Director, NBHM, Wezope Kenye-i, ninang ya koda tongtibang ibaji bilemettsü aser ninang metsüba ajungkettsü aser alima tzü mopung aser lokti tarutsü tajungba ka asoshi ninang kümzüka ayutsü atema jenjang tapet agitsü ayongzüka liasü.

Sentong nungsa district level Best Bee Keeper Award, state kübok tesem balala nungi ninang metsür parnok 16 nem agüja liasü.

Sobaliba kentener Mari Mathis-i Hornbill nung shilem agi

Dimapur, Luchii/December 5 (TYO): Sobaliba kentener Mari Mathis-i, Hornbill festival 2024 mezüngbuba anogo nisung meyirejang aika adenshir aliba mapang Welsh oshi agi ken tena liasü.

Mari Mathias ya kentener aser ken mejemer ka lir, shibai sobaliba kensütem tanü asüng kensütem den peta yanglur. Mari-i December 1 nü aser December 2nü Hornbill Music Festival 2024 nung shilem agiogo.

Arishi küm 24 tain kentener yagi mezüng la kija shilem agi aser iba sülen Naga nung sobaliba kentener Seyievinuo Chuzho den külemi shilem agia liasü. Tenati Welsh aser Naga nung oshi temeyoktep ken ka tena liasü.

Mari aser Seyievinuo nati December 3 nüa Raj Bhavan, Kohima nunga Handshake Concert mapang shilem agiogo. Taküm Hornbill benjung atema Wales ya designated partner ka kümdaksüogo. Welsh sorkar den longjemer

British Council, British High Commission in India aser Wales Arts International nungeri tarutsü nunga Wales aser India na culture fund ka ajanga arts projects tem nung senotsü intoka sobaliba dak sendakba nung kati ka nungi angazükteptsü aser ajungkettsü bendanga agütsüogo.

Cardiff nung amendaker aliba musician Gareth Bonello- a pa indang band Khasi-Cymru Collective den shilem agitsü atema Hornbill-i meyipa arutsü. Gareth November ita Wales aser India nunger musician tem longjemdaksütsü atema project ka benoka aliba asoshi music tasen mangaoktsü atema Meghalaya-i oa liasü.

Gareth-i December 8 nü Hornbill nung flautist aser visual artists Benedict Hynniewta den shilem agitsü.

Mari-i, Welsh nung sobaliba alima dang sayutetba atema kanga nema danga bilemer ta ashiba den Wales aser Nagaland na sobaliba mesüktepa lir ta ashi.

"Naga-Land & People in Archival Mirror" exhibition lapoka lir

Dimapur, Luchii/December 5 (TYO): National Archives of India aser State Archives of Nagaland nung yua aliba historical archival records aser noksatem dak amendaker World War II Museum, Kisama nung December 1 nü nungi 25buba Hornbill benjung amungba mapang "Naga-Land & People in Archival Mirror" ta nungja agütsür exhibition ka lapoka lir.

Iba exhibition ajanga Nagaland puti otsü, sobaliba aser state terenlok indang

tangazükba agütsür, koba putu aika mangaoka aruogo. Exhibition ajangsa state melesnshia aoba mapang tongtibang tatalokbatem aser nüburtem indang tangazükba agütsür.

State indang documentary heritage ama archival treasurers indang tangazükba agütsütsü atema State archives exhibition ya nüburtem atema amenoktsüogo aser archival institutions ya tarutsü nung terenlok asoshi koda tongtibang iba indang angazükdaksütsü nükjidong nung

iba exhibition lapokogo.

Exhibition ya December 1 nungi 10 tashi lapoktsü aser iba ajanga Naga nung puti otsü, sobaliba aser yimden yimsütsüba indang angazükdaksütsü. Map, noksa aser kuli kaket tongtibangtem iba exhibition mapa sayadar. Exhibition nungsa peace missions, 1963 Assembly Elections, political movements aser Dr. S. Radhakrishnan aser Ato Kilonser, Narendra Modi nungeri state semdangba amala tongtibang noksatem angutsü.

Angami nungeri arr atsütepba kokogo

Dimapur, Luchii/December 5 (TYO): Naga nung sobaliba dak ajemdaker arr atsütepba tetoktepba December 5 nü 25buba Hornbill Festival amungba mapang Naga Heritage village Kisama nung arena tongtiba nung asayaogo.

Teburtem arr atsütepba Angami nungeri akok aser tanabuba aser tasembuba nung Garo aser Konyak nung liasü.

Tetsürtem tetoktepba Angami tsürtemi akok aser tanabuba aser tasembuba

jenjang nung Sangtam aser Kachari kin liasü.

Tetsür aser tebur tekoktepba akokertem nem senpet sen meyirejang metsür pongu agütsü aser tanabuba aser tasembuba jenjang nung takok angurtem nem meyirejang terpongu aser meyirejang ter agüja liasü.

Brehostibarnü tetsür aser tebur arr atsütepba ya nüburtem ajaki kanga pelatepa reprangogo aser pei kin takok tashi pusemtepa reprangogo.

Temesepba mozü raksa intoktsü




Dimapur, Luchii / December 5 (TYO): Police Commissionerate, Dimapur kübok Drugs Disposal Committee (DDC)-i, Brehostibarnü DMC Dumping Ground, Burma Camp, Dimapur nung parnoki pua aliba temesepba mozütem raksa intoktsüogo.

Sen 34,82,87,425 alang temesepba mozü raksa intoktsüogo aser Police Commissionerate Dimapur kübok police station balala nung ken o 79 benokogo.

Police temi raksa intoktsüba temesepba mozütem rongnung brown sugar, shanflower, heroin, spasmoproxyvon capsules, nitrosen tablet, crystal meth, opium, cough syrup, Opium straw aser WY tablets densema liasü.

Commissioner of Police, Dimapur Kevithuto Sophie, shiba DDC mendenbuba lir, pai repranga lia item temesepba mozütem ya raksa intoktsüogo. Maneni Chumoukedima, Dimapur aser Niuland nungi ketdangsurtema iba sentong nung dena liasü.



MLA & ADVISOR

**Fire & Emergency Services,
Home Guard & Civil Defence
Relief & Rehabilitation
Nagaland : Kohima**

S. KIUSUMEW

MESSAGE


On the occasion of the Home Guards, Civil Defence & State Disaster Response Force Raising Day, I extend my warmest greetings and felicitation to the Director General and all rank and file of the Department.

Ever since its inception in the year 1946, HG,CD & SDRF have been rendering the service with outmost dedication and shall continue the same with sincerity and zeal in all situations. On this auspicious occasion let us once again renew our spirit of dedication to move forward with more energy in serving humanity, marching towards excellence.

I would also like to extend my best wishes and compliments to all families of Home Guards, Civil Defence and State Disaster Response Force, who silently contribute equally by supporting in every way possible.

God bless us all

Warm regards,



(S. KIUSUMEW)

MOKOKCHUNG DISTRICT DISABLED FORUM (MDDF)

Raffle draw result 03/12/2024

| | |
|----------------------|-------------|
| 1st prize ticket no. | 1781 |
| 2nd prize ticket no. | 9857 |
| 3rd prize ticket no. | 0420 |

Consolation prize: Ticket no. 1429, 2153, 7195, 5305, 9909, 1080, 3225, 1064, 9760, 3831.

शपथ ग्रहण समारोह



December 05, 2024 nü Ranchi nung Jharkhand Angh, Santosh Gangwar aser Chief Minister Hemant Soren nati Raj Bhavan nung minister tem tenangzükba agiba sülen parnok den tangokba noksa nung angur.

Maharashtra nung Devendra Fadnavis-i CM tenangzükba agi

Mumbai, Luchii/December 05 (Agencies): Brihostibar nikongdang Mumbai nung aliba Azad Maidan nung BJP legislature party lenir, Devendra Fadnavis-i Maharashtra Chief Minister tenangzükba agi aser Mahayuti teloktep nung dena aliba NCP lenir, Ajit Pawar aser Shiv Sena lenir Eknath Shinde nati Deputy Chief Ministers tenangzükba agi.

Tenangzükba agiba sentong nungji Ato kilonser Narendra Modi den Bollywood aser Sports naprongla nungi nungutug nisung aika densema liasü.

Fadnavis-i tang agi tasembenbuba CM tenangzükba agiogo.

Maharashtra Angh, CP Radhakrishnan-i ketdangsüa lenir asem nem tenangzükba agidaksü.

Osangbenertem den jembidang BJP lenir Sudhir Mungantiwar-i, taruba anogotem nung Cabinet nung züngsemtemi tenangzükba agitsü, ta metetdaksü.

Maharashtra nung sorkar tasenba tenangzükba agiba sentong nungji Union Home Minister Amit Shah, BJP national Tir JP Nadda, Defence Minister Rajnath Singh aser

Uttar Pradesh Chief Minister Yogi Adityanath nung densema NDA-i yimsüsüba state tem nungi Chief Minister tem aser Deputy CMs aika densema liasü.

Kasa sentong nungji cricket asayar nungtugu Sachin Tendulkar, actors Ranbir Singh, Salman Khan aser Shah Rukh Khan nungera liasü.

NDA teloktep nung densema aliba Bihar CM Nitish Kumar aser Andhra Pradesh CM N Chandrababu Naidu nata iba sentong nung denogo.

Tawa state assembly election nung BJP-i menden 132 tashi nung takok ngua liasü.

Parliament nung sorkari tongtibang osang aika magütsüet

New Delhi, December 05 (Agencies): Osang ajak tejangja anguba putu ka nung Centre sorkar ket nung tongtibang osang (data) aika maliasü.

Tang asükwa mongpu Parliament senden tagidak mapang nung MP temi kanga tongtibang onüktem nung sorkar dang data asüngdanga liasü saka sorkari telangzüba aika magütsüet.

Sorkar ket nung exam paper leaks, shisaliok rejutem nung SC/ST kaketshirtem bendangshidanga züngshiba, sorkar hospital tem nung medical interns soseta asüba aser alima tzü-mopung lendong balala nung takoksa anguba data sorkari magütsüet.

Bodhbarnü Parliament nung ministry of home affairs-i, tzü-mopung lendong ajanga takoksa anguba osangtem sorkari mebedener, ta metetdakja liasü.

Rajya Sabha nung MP, Randeep Singh Surjewala-i,

Wayanad nung anentsüh lendong atalokdang nisung kwi asü, kwi yiru, kwi temang lemta aser kwi sama?, ta asüngdang saka Centre sorkari, central ministry-i item ama data mebedener, ta metetdakja liasü.

Iba sülen Rai-i, taküm August 17 nü Kerala state sorkari shidi ka ajanga Centre dang, Wayanad nung anentsüh lendong nung nisung 359 asü/sama, nisung 95 temang lemta aser nisung 378 yirua hospital nung among ta metetdaksüogo, ta ashi.

December 3 nü Parliament nung ministry of health and family welfare-i, sorkar hospital tem nung medical interns soseta asüba data parnoki mebeden, ta metetdakja liasü.

Parliament nungsa tasüngdanga langzüdang Centre sorkari, central universities, IITs, AIIMS, aser tanga public sector institutions nung scheduled caste (SC)

mesüra scheduled tribe (ST) nungi kaketshirtem bendanga züngshiba osang sorkari mebedener ta metetdakja liasü.

NCRB data nung shia aliba agi, 2013 küm nungi 2022 küm tashi nung scheduled castes aser scheduled tribes nisungtem anema inyakba ken o lakh 5.24 dak tali liasü.

December 2 nüa Parliament nung tasüngdanga langzüdang sorkari, Central agencies-i ketdangsüa agiba exams nung paper leaks indang osang sorkari mebedener ta ashi.

Lok Sabha nung tasüngdanga ka langzüdang minister of state for education, Sukanta Majumdar-i, "Competitive Examinations ya tentet balalai ketdangsüa agir aser Higher Educational Institutions nung admission atema-a tentet balalai ketdangsüa tatidang agir. Item ama tatidang dak sendakba tatalokba osangtemji ministry-i mebedener," ta metetdaksü.



December 05, 2024 nü New Delhi nung Parliament kima Congress MP Priyanka Gandhi den opposition MP temi longkak aيتدang tangokba noksa nung angur.

Odisha nung anogo shia azüi nisung 777 dak angor

Bhubaneswar, December 05 (Agencies): Odisha nung yaküm January ita nungi tenzüka taküm October ita tashi nung azüi nisung dak angoba tatalokba lakh 5.20 dak tema lir, ta Bodhbarnü state assembly nung sorkari metetdaksü.

Iba tetezü, Odisha nung kidang metsühba azü aser kibur maliba azüi anogo shia nisung 777 dak angoba den kasa lir.

Assembly nung Congress nungi Rayagada MLA, Kadraka Appala Swamy-i asüngdanga langzüdang Fisheries & Animal Resources Development Minister, Gokulananda Mallik-i, tesüiba ita 22 tsüngda state nung azüi nisung dak angoba tatalokba 5,20,237 liasü, ta ashi.

2023 küm azüi angoba tatalokba 2,59,107 liasü aser taküm January ita nungi October ita tashi nung tatalokba 2,43,565 liasü, ta paisa metetdaksü.

2019 Livestock Census ajanga ashiba agi, Odisha nung kibur maliba azü lakh 17.34 lir.

Animal Birth Control Rule, 2023 ozüing benokba sülen municipalities aser urban local bodies-i organization balala ajanga Animal Birth Control programme kübok azü zünba azüoktsü atema maparen balala inyaker, ta paisa metetdaksü.

2022-23 kümsük nung Odisha nung urban area 8 nung kibur maliba azü 4,605 'sterilised' sütsüogo, ta minister-isa metetdaksü.

Bhutan Chuba Wangchuck aser pa kinüngtsü nati India semdang



December 05, 2024 nü New Delhi nung Ato kilonser Narendra Modi aser Bhutan Chuba, Jigme Khesar Namgyel Wangchuck na senden ka amenba sülen tangokba noksa nung angur.

New Delhi, Luchii/December 05 (Agencies): Bhutan Chuba, Jigme Khesar Namgyel Wangchuck aser Chubatsür, Jetsun Pema Wangchuck na Brihostibarnü New Delhi tonga aruogo; tenati anogo ananü India semdang.

India aser Bhutan na tsüngda tesendaktep tashi itshitsü nükjidong nung Wangchuck-i India semdang. Tena New Delhi tonga aruba mapang nung External Affairs Minister S. Jaishankar-i tayimtsü anendak tena agizüka liasü.

Tesülen Jaishankar-i X ajanga, "Tamarener Bhutan Chuba, Jigme Khesar Namgyel Wangchuck tanü New Delhi tonga aruba mapang nung pa agizükba atema pelar. Pai semdangba ajanga asen linük ana tsüngda tesendaktep tashi itshitsü," ta metetdaksü.

Jigme Khesar Namgyel Wangchuck aser Jetsun Pema Wangchuck na den Bhutan nungi sorkar ketdangsertema aika densema aru.

Bhutan Chubai Ato kilonser Narendra Modi ajuruogo aser India sorkar ketdangertemia Bhutan Chuba ajurutsü, ta Ministry of External Affairs (MEA)-i metetdaksü. "India aser Bhutan na

tsüngda tesendaktep junga lir aser amalitepa inyaker. Pai semdangba ajanga linük anapronglai lenla balala nung amalitepa inyaksü aser maneni sector balala nung tesendaktep tajungba akümstsü atema maongka angutsü," ta MEA-i metetdaksü.

December 2 nü Bhutan nung Minister of Industry, Commerce & Employment, Lyonpo Namgyal Dorji-i, India ya Bhutan nungitba tongshi ka aser Bhutan ajungmesor ka, ta India tenüngsanga liasü.

Hombarnü New Delhi nung 29buba Confederation of Indian Industry (CII) Partnership Summit 2024 nung jembidang Dorji-i, "Bhutan atema anasatiba partner ka ama India-i shilem agiba ya nungita yariba tongshi ka dang masü saka ajungmesoba lir. Asen linük ana tsüngda tamang katepba aser amalitepba ya ajanga Bhutan ajungmesor," ta jembia liasü.

"Ato kilonser Modi lenisüba kübok India ya Bhutan ama linüktem atema alima lenir ka kümogo. India ya tamang katetba kiyonger ka dang masü saka ainba aser temelenshi tsütsü onok atema partner tajung ka lir," ta pai metetdaksü.



TIR YIMYIM YIMOBILEM (EDITORIAL)

DIMAPUR ROGONÜ, DECEMBER (LUCIII) 06, 2024

Asenok puteptsü mapang

Taoba putu nung asen tsüraburtemi Yisu temeim osang tajung dak amangba tamangba yimsü tajung den kaketshisatsü agi Naga kintem tanela aser shisa tenük lapokja tenzükba agi tangari asenok nüken kanga tsübua liasü aser asenoki parnok dang meimba dang nungi tuluba parnoki asenok meim. Aji oda, asenoka külem tsüraburtem nungi jakzükba kin ka dang ser nung meputepteti tsükchitepa aliba tia nungi Yisu temeim yimsü tajung agi asenok putepdaktsü. Iba amaji ka Tsüngrem taochi agi asenok meputepdaktsü ka asünungbo asenok o asenok na tsükchitep dang tangari asenok samatsür lila. Aji oda, tanüa asenok ka kuma melongjemtetyonga asenok putepa alitsübaji kanga tongtibang nungdak ka kumogo. Atangji, asenok ajak yimten telok, political party, ka nung dangbo melongjemtetsü mesüra tamangba tsütsü kasa Yisu dak amanger telok asüyonga arogo aser mungdang ka nung dangbo melongjemtetsüa akok, ajisüaka asenok balala ser putepa lira, ibaji telongjem ka nung ser meputep aliba dang nungi kanga agia tajungba aser tashitaitba asütsü. Asenok yimten aser arogo balala nung denaka asenok putepa ali tashi asenoki Naga nungertem nem lenisüba tajung agütsütet aser tangari asenok nüken tsübu. Iba tensa taji tanü asenok mapang den medemdangra, tanübo asenok telongjema melongjem aser teputepa meputep pei pei ali litepba mapang ka lir. Aji oda, alima rongsen aser government mapa raktepba agi dang masü saka, talisa, asenok election nung akoktsü mechi asenok kati ka dang maochii inyaktepba aser tangar telok aniloker tashiyim inyakba mapatem agi takok anguba süngjang taku dang asenok ongzüka achir. Aji oda, tashiyim agi akok nungji asenoki talangka moutet aser iba jagi asenok rongnunga meputep tenzük aser tangbo asenok dang jashir ajak longjemer asenok mezüngmeshiba mapang ka asenoki ajurur. Iba ama mapang ka nung asenok rongnung kati ka dang taidok meshitsüla aser kati ka nem taidok agüja putepshi tenzüksüla. Asenoki aiben asen kin tushia jembidang, tasü mang yutsür maoba kin ta jembir saka tanübo asenok ya taküm yutsür maoba kin asütsü tim. Tanga Naga kintem den apitepra, Ao kin ya kin tulu, nütsüng aika moaja lir aser rongsen aser temetetba nunga takar ta ashitsüa akok. Ajisüaka, kodaser tanübo tangari yamai asenok telatetsütsür ? Asenoki aremzükba agi asü (?) mesüra asenoki majung inyakba agi mezüngmeshir ? Kechiba Ao kini inyakba tajung indang jembitsü melen tamajung -tamajung dang shimteta jembir ? Ibaji bilemdanga asenoka asen tashimait bushitsü mapang tajungtibaji ya asütsü. Asenoki tamajung inyaka lira, Tsüngrem danga aser nisung danga taidok meshia putepshi tenzüksüla. Aji oda, asenoki tamajung inyaka yur, item tesüba otsütem mejembili ta mimbanga yura, iba jagibo meputep dang adentsü, kechiyong tashidak mimbanga yur temang junga alitsü makoktsü. Joko, asenok ya tangar külen aser asenok külen ta yimten, loktiliba aser tashitemetet tongpang nung nokdakadokogo, anungji asenokji puteptsüsa akümer. Ashiko, asenok rongnunga nisung aika Ao kin leniba nung manidaknüba purtema alitsüa akok, kechiyong parnokji pei nisungi yirutsüba purtem asütsüa akok, ajisüaka tanübo anidaknü - manidaknü ta masü saka Ao kin leniba nung anidaktsüla, kechiyong iba jagi dang na kumzüksü. Tanübo na anema shingaia mejembir aser tamajung meinyaker asütsüa akok, ajisüaka tanü tangari asen nübör anema inyakdang aseni iba anemaji ola madokra, asüngbo asen dangi kasa khuretji arutsü. Aji oda, asenok meputepba agi tangari asenok kija-kija mezüngmeshi tenzüksü. Hitler mapang Germany nung Pastor Martin Niemöller-i ashi ama, "tamasa parnoki socialist pur bushia aru saka ni kecha mashi, kechiyong ni socialist masü, ano parnokisa shishilembar lenirtem bushia aru, idangjia ni kecha mashi kechiyong ni shishilembar rogotem masü, ano parnoki Yihuda nunger bushia aru, idangjia ni ola madok, kechiyong ni Yihuda nunger masü. Tesüsa parnoki ni bushia aru aser idangjibo ni asoshi jembitsür kata anünga mali asü." Iba amaji asenok dak mataloktsüsa tangar dak tamajung atalokdang, iba anemaji asenokia ola adokra, asen dangi marudang tamajungji nokdangadoktsü.

OLEMSABANG

AO OSHI OJANG KAR MEDEMDANGBA

~ P. Renty Jamir.

(Yashi adok nungi...)

34. **MESÜTEP/SENTAKTEP**:- Ana ya tera balala lisü ana mesütep. Nashi aika külemi sentaktep. Ana ka kuma mesütep aika sentaktep.
35. **METETTEP/SHITETTEP**:- Ana ya balala metettep süra tejen asütsüa akok tasen asütsüa akok. Tang ajurutepa kati ka metettep. Shitettep süra tejen tembar khenbo ajurur aliba mapang talangka air aliba tanaben ajurutepa shitettep . Nai ni shiteter ma?
36. **MEYOKTEP/MEZÜTEP**:- Ana ya mesükteper chi nung Lon mezütep. Jang temesüng O temerem na mezütep, Totsü O kerosin na meyoktep meyoktep teimba nung amshir mezütep ishiba nung amshir.
37. **MELANGTEP/SÜTEP**:- Mesükteper saka balala. Melangtep süra temang azüteper noktaker melangteper ano takok toktepa-a melangteper. Sütep süra noktaker, mener, mejanger, rarateper aser takok toktokper masü rarateper.
38. **NGAJATEP/TSÜLUTEP**:- Ana ya kasa tepila mali kidang mazüokba tanurtem ngajatep. Tanur tamajung tesa tashi manga tsülutep.
39. **NETTEP/PETTEP**:- Ana ya tepila mali. Nettep mapa aika bendena ayu meinyakmar pettep mapa ana asem külemi ariteper.
40. **PAITEP/ZÜTEP**:- Ana mesükteper saka balala paitep süra lisü ana paitepa ayu khen paitep asütsüa akok anaben asütsü akok. Zütep süra süngzü (lisü masü) ana külemi zütep per ana zütep aiben.
41. **PATEP/PETTEP**:- Ana mesükteper saka balala patep tetezü teka sangshia raratep. Pettep süra teka sangshia raratep asütsüa akok tebang tesa agi O shitepa aintepa raratep asütsü akok.
42. **PUTEP/SEPTTEP**:- Ojang ana ya mesükteper saka tera balala putep süra taküm Ak ki nung ak aika putepa ayu. Septep süra taküm aser takong tera ajak külemi An ki nung an ana septep makang nung shi takong ango takong külemi septep. Taküm putepa ayu takong septepa ayu.
43. **ROKRÜTEP/YARITEP**:- Ana ya kasa saka tera tepila lir. Rokrütep ya aika nungbo mejembiteter alu mapa nung rokrütep ki mapa nung rokrütepa inyak, yamala yaritep yabo ajak nung jembir. Sarasadem nung yaritep timtemer manemer den yaritep. Lesson makokba yaritep.
44. **SHIJITEP/TSÜNOTEP**:- Mesükteper saka tera balala shijitep kilem nung süra atungdang kar tazünglen kar talaklen ta shijitepa atunger. Tsünotep tzüyük nung ango alemdang tulu tila tsünotepa alemer. Tazüng O talak shijitep tulu O tila na tsünotep.
45. **SÜITEP/TSÜKITEP**:- Ana ya kasa kecha tepila mali. Jashitep O ka ashi nung aji kuoka ayu. Nüngsen O ka angashia jashitep. Kasa O kasa na tai metoktep maremzüktepi aliba.
46. **SHISHITEP/SANGTONGTEP**:- Ana ya kasa saka shishitep süra nisung ka ka dang shiyonga ao. Sangtongtep süra telok mepu kiyong nung sangtonga ao.
47. **SEMPATEP/TSÜKCHITEP**:- Ojang ana ya kasa sempatep temeimtep aliba sama. Kati ka majinü. Ano sempaba dang nungi tsükchiba ya tamajungba pai/lai sempaba dang masü tangar dang nungi tsükchiba ya tamajungba pai/lai sempaba dang masü tangar dangmajung indang ashi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rajasthan nung BJP sorkar tasenbai anti-conversion bill agizük

December 05, 2024: Rajasthan nung BJP sorkar tasen Cabinet-i Rajasthan Prohibition of Unlawful Conversion of Religion Bill 2024 agizükogo.

Iba bill ya ozüing akümstü atema state assembly aser Angh-ia agizüktsüsa akümstü.

Chief Minister Bhajan Lal Sharma leniba nung amenba Cabinet senden nung agizükba anti conversion ozüing kübok kangshia yimsü meyipdaksüba ajanga takoksa anurtem nem sen lakh 5 teyari agütsüsü aser iba ozüing alema inyakertem küm 10 tashi tepuokdak ayutsü.

Iba ozüing kübok tanga yimsü dangi meyipnertemi anogo 60 bosa jelia District Collector nem osang metetdaksütsüla. Yimsü meyipbaji pei sasa melungtetba agi asü kari mesüzükba ajangaar District Magistrate-i tama bushisüingdangtsü.

Iba ozüing kübok mezüing aibelenertem küm 1 nungi küm 5 tashi tepuokdak ayutsü akok aser anaben dak tali aibelenertembo küm 10 tashi tepuokdak ayutsü akok.

Ano tanurtem, tetsürtem aser Scheduled Castes mesüra Scheduled Tribes nisungtem kangshia mesüra mesüzüka yimsü meyipdaksürtem nembo temerenshi tuluba agütsüsü.

Iba ozüing kübok tanurtem, tetsürtem mesüra Scheduled Castes (SC) aser Scheduled Tribes (ST) nisungtem yimsü meyipdaksüba ajanga aibelenertem küm 2 nungi küm 10 tashi tepuokdak ayutsü akok aser senchi 25,000 achitsü. Ano

khen nung nisung aika yimsü meyipdaksürtembo küm 3 nungi küm 10 tashi tepuokdak ayutsü aser senchi 50,000 achitsü.

Deputy Chief Minister, Prem Chand Bairwa-i, "Nisungtemi memeteba yimsü ka dangi meyipdaksütsü atema parnok mesüzüker. Tanga state tem nunga item ama ozüingtem benoka lir. Kangshia yimsü meyipdaksüba nokdangtsü atema onoki temerenshi telemsa balala benoker," ta metetdaksü.

Law Minister Jogaram Patel-i, "Arrshi küm 18 ser temapurtemi tim inyakyim ajanga yimsü melentsü akok. Yimsü temeden ya fundamental temeden ka lir. Kangshia yimsü meyipdaksüba nokdangtsü atema dang onoki meranger," ta ashi.

Ano kasa ozüing kübok amokmeren mesüra mesüzükba agi kiyimba ajak thinentsüsü akok. Yimsü meyipdaksüba sentong agitsü atema anogo 30 jelia osang metetdaksütsüla aser nisungba jagi anogo 60 jelia affidavit ka ajanga District Collector nem metetdaksütsüla.

Ajisüaka iba ozüing ashishia opposition-ibo, BJP-i loktiliba nung telemsa adokdaksür, ta aitsüogo.

Taoba mapang minister Pratap Singh Khachariyawasi, "State nung anti-conversion ozüing liasü aser BJP-i nüburttem dang parnoki mapa karbo inyakdar ta sayutsü atema temelenshi kar benoker," ta ashi.

Congress Tir, Govind Singh Dotasara-i, yimtenren nung tajanzük angutsü atema BJP-i Hindu nunger aser Muslim nunger bendanger, ta aitsü.

Rajasthan nung 2006 aser 2008 kümtem nunga BJP-i anti conversion ozüing benoktsü merang saka Congress, meimchir temeden atema inyakba teloktem aser minorities-i iba bill anema nokdaka liasü.

State aika nung anti conversion ozüing kübok Khristantem nem tai tonglokja apur.

State nung iba ama ozüing ka maliba nung ajemdaker 2017 küm Rajasthan High Court-i kangshia yimsü meyipdaksüba nokdangtsü atema telatetba kar sangdonga liasü aser aibeneritem anema inyaktsü asoshi District Collectors nem tashi agüja liasü.

Iba ozüing ya benokra India nung anti conversion ozüing benokba state 12bubaji Rajasthan akümstü. Uttar Pradesh, Gujarat, Madhya Pradesh aser Uttarakhand state tem densema tang state 11 nung anti conversion ozüingtem benoka lir.

2022 küm Karnataka nunga anti conversion ozüing ka benoka liasü ajisüaka 2023 küm June ita nung Congress sorkar aruba sülen iba ozüingji agiena liasü.

Tang Centre aser Rajasthan naprongla nung BJP sorkar lir, anungji Rajasthan Assembly nung iba bill ya agizüka ozüing akümstü akok.

ANO GO ABEN TSÜNGREM DEN

Khrista tabensa tenla

"Kechiyong tenlaba ka agi pai temeshitetertem teti tatem makai abensadaksüogo" Ibr 10:14.

Yisu Khristai kangki nung tenlabaji Tsüngremi agizüker, kechiaser Pa tenla jagi kotaklen tuyur.

Saka yangi tezüluri agütsüba onükji Khristai tekümtet asoshi tabensa agütsüba nung shirnoki amanger parnok kümzüktsüba indang lir. Kodang Khrista asü, asenok Pa den asü. Kodang Khrista arem tamanger ajak Pa den arem. Kodang Khrista shia aru, asenok ajak Pa den shia aru.

Shirnok temeshiba sobutsü sobur parnok sentsüwangshi süngkümi aitsü. Asenok Khrista den amentsü temsüa akümstü; Pai alangzükogo. Tsüngrem tsüngdang tanela nung nung asenoki lemsateper. Tsüngrem tsüngdang asenok tagizüktsüsa kumdaksüogo. Khristai asen menen aben. Tsüngremi asenok temeshiba sobutsüogo.

Kodang asenoki Khrista tejak o tejak na ajurutepa ngudir, asenok Khrista mesüka alitsü. Oh! kechi komaka sentsüwangshi nung alitsü, aji yongyar !

India nung yimtsüing 8 nung Khristantem alitsü nokdang

December 05, 2024: India nung Chhattisgarh state kübok Sukma District nung aliba yimtsüing 8 nung village councils-i bangzüing ka renema yimtak Khristantemi Khristan yimsü toktsütsüla mesüra yimtak melidaksütsü, ta metetdaksü.

Item yimtsüing 8 nung Khristantem jagi Khristan yimsü metoktsüra parnok meyong alu aser kiojen ajak agiadoktsü, ta metetdaksü.

Iba tetuyuba ajanga Khristan 100 shi kongshitsü.

India linük temzüing nung Arrla 25 kübok senso ajak nem yimsü temeden agüja lir, anungji item yimtsüingtem nung Village Councils-i linük temzüing alema inyakogo, ta Michwar yimtak tongti yimsüsürübo aitsüogo.

Khristantemi Michwar yimdaki oa police station nung ken o ka benokogo aser yimtak tongti yimsüsüri jembiba kulia agütsüogo. Ajisüaka mezüingbo police-i First Information Report (FIR) file asütsü memelungi liasü.


Khristantem pei yimdaki meyipa aodangbo parnok meyong alu nungi auyar liasü aser parnok dang Khristan yimsü tokjang mesüra yimtak nungi oadokang ta metetdaksü.

Item yimtsüing nungi Khristan 40 bo yimtak nungi oadokogo aser tang Michwar yimtak aliba Tenla kidang jenoka lir.

Christian Solidarity Worldwide (CSW) Tir, Mervyn Thomas-i, "Chhattisgarh nung yimtak yimsüsürtemi yimtsüing nungi Khristantem meindokbaji CSW-i aitsür," ta metetdaksü.

Thomas-isa, "Onoki ketdangsertem dang iba tatalokba nung tiyongtsüi ia inyaktsü aser yimtaklirtemi renemba bangzüing sangdongba sülen takoksa anurtem nem temenok agütsütsü mepishir. Iba dak alia Khristantem tanaben yimdaki meyipa aotsü aser parnok amokmeren masütsü atema inyaktsü mepishir," ta mepishia metetdaksü.

United Kingdom ya joko Khristan linük ka masü: Philip Egan



December 05, 2024: UK nung MP temi 'assisted dying bill' pusema vote agütsüba aija Khristan putir kati, joko Britain ya Khristan linük ka masü, ta metetdaksü.

O entepba sülen House of Commons nung züngsem 330-i England aser Wales nung mapang talangka kanga timtema shirangertem aser ita 6 den tajemba taküm alitsüpur shirangertem yaria südaksütsü pusema vote agütsüba sülen Portsmouth nung bishop, Philip Egan-i par Arogo dangi Advent Christmas shidi ka zülü.

Iba bill anema vote agütsür 275 liasü.

Assisted dying bill kübok joko mapang talangka shi nung kanga timtema shirangertem mesüra joko ita 6 den tajemba taküm alitsüpurtem yaria südaksütsü atema doctor ana den judge katia agizüktsüsa akümstü.

Philip Egan-i, "Ya meimlai aliba ka liasü saka iba vote ajanga lendong tulu ajurutsü. Britain-i arrla ka adena aoer aser iba nungjagi meyipa marutetsü," ta metetdaksü.

"Tarutsü nungbo Khristan ka asütsüji temelabo masütsü," ta pai ashi.

Iba bill benoksang MP, Kim Leadbeater-i, iba ozüing ya

taochi sayutsü nükjidong nung benokba lir, ta metetdakja liasü.

Vote agütsüteptsü jelia lai Bishop of London, Rt Revd Sarah Mullally aser taoba mapang Archbishop of Canterbury Lord Carey na densema Khristan lenirtem aika ajurua liasü.

2002 küm assisted dying bill atema jembidang Lord Carey-ibo, ozüing melenshitsu nungdak, aser ozüingji taochi aser tangatetba tajung nung asütsüla, ta jembia liasü.



Louisiana nung Greater Union Baptist Church Tenla ki tasenba noksa nung angur. 2019 küm nisung kari iba Arogo Tenla ki tejenba rongdokja liasü aser tanaben süshiba sülen tan ita semzüktsü.

AO OSHI ANGAZÜKDAK:

TANÜ ANGAZÜKTSÜBA OJANG



Tat

(v) nung ta metenoktsüba ola (scolding voice)

* Obalai onok tashi manga dang tat ta metenoktsü.

Tata

(v) ajak akoa alemba shilem (due share)

* Yimkong saru agütsüsbaji kü tata shilem lir.

OLONG PAITEP # 7003

Grid for OLONG PAITEP # 7003 with numbers 1-17 and shaded cells.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7002 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.



MEDEMER ANA KÜM TATEM OSANG AGÜTSÜR

Takar : Taküm 2024, January nungi November ita tashi ni teimtemer nisung aika apok atsü agüja aser rongsen apuja yaria aruogo.
Sensaker : Nia kü nübo aser ni züsentetba aonsotsü, an, ak aser nübu agi nübur aika yariogo aser telok telok chiyongtepa benjung lidaktsüogo.
Takar : Na maka mait nung kodaser telok telok chiyongtepa benjung lidaktsü?
Sensaker : Ni telok aika dang Interest nung sen apua lir, aser ita shia parnok nem tetemlok interest sen agütsür, aser iba sen tetemlok jagi parnok chiyongtepa benjung lidaktsür.
Takar : Na maka mait nung kechi aonsotsü, an aser ak agi koda yari? Nibo kü rongsen aser itasen agi yariba jembir.
Sensaker : Nü itasen aser ochi mashiba rongsen anguba nungi sensaker nem sen interest nung aputsür nai parnok yarir ta jembir na? Nibo ochishia kü nübo intoka züsenba agi aonsotsü, an aser ak yoker interest agüja parnok peladaktsür. Idakji na-a dena lir masü na?

Lilir : I Jamir, Dimapur.

Shillong ropeway project atema nüngshilong azüngogo

Shillong, Luchii/December 5 (Agencies): Meghalaya Chief Minister Conrad K Sangma-i Bodhbarnü, state yimtiba Shillong nung sen crore 174 intoka passenger ropeway project ka amenoktsü atema nüngshilong azüngtsüogo.

Iba amala project ya tang mezüngbuba Meghalaya nung benoka inyaktsüba lir. Iba project ya French company POMA den longjemer inyaktsü, shirnoki tenüngdakba osettem agütsütsü.

CM Sangma-i ashiba agi, iba inyakyim ajanga state nung tourism infrastructure

ajungketsü atema state sorkar bendanga agütsür aliba sayur. Paisa, ali alizüktsüba, temelaba balala meshiba aser safety standards achaayangtsü atema Meghalaya Ropeway Development Authority amenokba aser licensing amala inyakyim dak sendakba nung tetsükdaktsü aika ajangshio, ta ashi.

Pai ashiba agi, ropeway ya urban transportation indang mode ka ama amshitetsü aser yimti nung gari senzüsenpong kanga mesüa kümer aliba asoshi tanga lenmang ka lapoktsütsü.

Iba project nung shilem ka ama chief minister-i iba inyakyim atema ali alizüktsü asoshi Riat Laban Dorbar nem tanabuba installment sen crore 1.5 agütsüogo.

Conrad-isa, Riat Laban Dorbar dang parnoki teka amteper inyakba aser iba project nongita yariba atema kanga pelaba lemsatepa liasü.

Ropeway ya yangluzükba sülen Laban, Madan Laban, Upper Lumparing, Lower Lumparing, Lumkjatsngi, Oxford Hills aser Rngi Shillong ajanga senzütsü.

Tawang museum anepalutsü atema Arunachal govt aser Army na nangzüktep

Itanagar, Luchii/December 5 (Agencies): Arunachal Pradesh sorkar aser Indian Army ya Tawang nung Major Ralengnao Bob Khathing Museum of Valour achaayanga anepalutsü atema tenangzüktepba ka nung sign süogo.

Iba MoA nung ya Tawang Deputy Commissioner Kangki Darang aser Indian Army's 190 Mountain Brigade Brigadier V S Rajput nati Chief Minister Pema

Khandu matsüngdang sign süa liasü.

Tenangzüktepba nung iba museum anepalutsü atema Indian Army nem temelaba agütsüogo.

CM Khandu-i India indang mezüngbuba Home Minister Sardar Vallabhbhai Patel nem tetushi agütsü, shibai 1951 küm Major Bob Khathing nem tetuyuba agütsür Tawang-i arua iba tesem azioka liasü. Iba tesem ya mezüngbo Tibet nunger

ketdangsurtemi azioker liasü.

Paisa, museum amenoktsü atema defence indang ali agütsüba atema Indian Army dang kanga pelaba lemsatepba den iba museum achaayangtsü atema mulunga agizükba atema- a kanga pelaba lemsatepa liasü.

Chief minister-isa, museum achaayangtsü aser anepalutsü atema sorkari nüngdakba mapang ajak nung teyari agütsütsü ta nangzükogo.

Manipur: Assam Rifles-i PREPAK (RA) züngsem 2 apu

Imphal, Luchii/December 5 (Agencies): Assam Rifles-i, Manipur nung amendaker aliba People's Revolutionary Party of Kangleipak-Red Army PREPAK (RA) telok nungi züngsem ana puogo.

Central paramilitary force nungi sepaitemi telungpur ana ya Tegnoupal district nung Moreh kübok Indo-Myanmar arrtsü nung Border Pillar-79 anasa pua liasü, ta Assam

Rifles-i sangdong ka ajanga metetdaktsü.

Itangitertem nungi osang tejangja angazükba sülen telungpurtem senzüba lenmang asütsü ta temulung melemi bilemba lenmangtem nung sepaitemi item telungpurtem ya mendanga ata liasü.

Border Pillar-79 anasa mendanga ataba mapang nisung ana atsü adener India-i aitsü meranga aliba puteta

Iba sülen sepaitemi takaratiba nung jenjang agia telungpur ana ya pua liasü.

Ken o ashishiba mapang tenati tena PREPAK (RA) telok nung züngoksema aliba jangjaja liasü, ta kasa sangdong ajanga metetdaktsü.

Sepaitem apuba telungpur ana ya ken o maneni bushisüngdangtsü atema Pallel police nem bendanga agütsüogo.

Message from La Ganesan, Governor of Nagaland, dated December 03, 2024. Includes photo of La Ganesan and the Nagaland state emblem.

Office of the MOPUNGCHUKET AIT LAISHIR TELUNGJEM

Tenüngsang Agütsür

Mopungchuket Ait Laishir Telungjem (MALT) nungi iba tezüluba ajanga Sb.AOWATI JAMIR, Wb. Jepdakmangyang Jamir aser Wt. Toshila Aier na Jabaso, nem NPSC (CTSE) tatidang nung Junior Engineer (Civil Engg.) (Class-II Gazetted) PHE Department, jenjang ajangzüktetba asoshi tepela den khonang tetushi agütsüba lemsateper.

Tematiba Tsüngremi pa tarutsü wadang aser taküm maneni moajangma.



Sd/- Katilong Jamir Tir

Sd/- Yimdonglong Jamir Tongti Zülur



Office of the Chuchuyimlang Senso Mungdang

P.O. Chuchuyimlang - 798614 Dist. Mokokchung, Nagaland

TENÜNGSANG AGÜTSÜR

Wb. Imnaangshi aser Wt. Imkongla Imsong na jala Wt. Atenla Ao, lai sensosanger ajak nem khonang tulu bentsür arua NPSC/CTSE 2024 tatidang nung takok ngua Assistant Public Prosecutor (Class-1 Gazetted), under Justice and Law Department, Govt. of Nagaland, jenjang ajangzüktetba asoshi tenüngsang agütsür.

Tsüngremi nü taküm aser wadang nung maneni moajangma.

Sd/- S.T. Nokdang Lkr President, CSM

Sd/- S.Temsü Pongen Secretary, CSM

Mokokchung District Disabled Forum (MDDF)

Raffle Draw Result 03/12/2024

Table with 2 columns: Prize and Ticket No. 1st Prize: Ticket No. 1781, 2nd Prize: Ticket No. 9857, 3rd Prize: Ticket No. 0420, Consolation Prize Ticket No.: 1429, 2153, 7195, 5305, 9909, 1080, 3225, 1064, 9760, 3831



METETDAKTSÜR

North Eastern region nung North East-Northern/Western Inter Connector den sendaktepa aliba Transmission system kübok 2019-24 atema Transmission tariff yanglushitsü atema petition aser 2024-29 tariff block for Petition-1: Assets atema transmission tariff jangjatsü atema.

- 1. Tekalen shia alima Transmission system nung tajangzüku angurtem: (1) AEGCB (2) MECL (3) Government of Arunachal Pradesh (4) Power and Electricity Department, Government of Mizoram (5) Manipur State Electricity Distribution Company Limited (6) Department of Power, Government of Nagaland (7) TSEB (8) HPSEB (9) PSPCL (10) HPPCC (11) PDD JGS (12) UPPCL (13) DTL (14) Chandigarh Administration (15) UPCL (16) RPCC (17) Northern Central Railway (18) BSES Yamuna Power Ltd. (19) BSES Rajdhani Power Ltd. (20) Tata Power Delhi Dist. Ltd. (21) New Delhi Municipal Council (22) MPPMCL (23) MSEDCL (24) GUVNL (25) ED Dabra & Nagar Haveli (26) CSEB (27) KSEB (28) TNEB (29) Electricity Dept. of Goa (30) Electricity Dept. of Puducherry (31) APEDCL (32) ASPDCL (33) APCPDCL (34) APNPDCL (35) BESCOM (36) GESCO (37) HESCOM (38) MESCOM (39) CESCL (40) TCTL (41) AVVN (42) Jodhpur VVNL (43) Jaipur VVNL (44) APPCC (45) BSEB (46) WBSETCL (47) GRIDCO (48) DVC (49) Power Dept, Sikkim (50) JSEB (51) Tata Steel (52) MPL (53) IND BEL (54) Ad HPL (55) LBPPPL (56) HSPPL (57) MB Power (58) HBPCL (59) JPL (60) KSK Mahanadi (61) PTC (62) IL & FS (63) APL (64) Torrent Power (65) HWB (66) ACB India (67) Enco Energy (68) Spectrum (69) BARC (70) BALCO (71) Dhariwal Inf. Ltd. (72) DB Power (73) NTPC (74) NHPC.

Table with columns: Petition no., Asset Detail, DOCO/Effective DOCO, Completion Cost as on 31.03.2024, 2019-20, 2020-21, 2021-22, 2022-23, 2023-24. Includes data for 2019-24 block and 2024-29 Block.

Table with columns: Petition no., Asset detail, Completion Cost as on 31.03.2029, 2024-25, 2025-26, 2026-27, 2027-28, 2028-29. Includes data for 2024-29 Block.

- 4. Determination of tarrid atema application copy ka applicant indang website www.powergrid.in nung inokja lir. 5. Petition nung aliba determination of tariff atema proposals nung temelenshitsu aser tai aputsü lira, teyari agirtem densema nisung mashi kati Commission indang e-filing portal ajanga mesüra tezüluba nung Secretary, Central Electricity Regulatory Commission, 6", 7th & 8th floor, Tower B, World Trade Centre, Naoroji Nagar, New Delhi - 110029 dangi (mesüra Commission indang office aliba address mashi dangi) petitioner indang copy ka dener corporate office dang iba sangdong adoker anogo 30 tsüngta yoktsüla.

Place: Gurugram Date: 29.11.2024 Chief General Manager (Commercial/RC) Sd/-

POWER GRID CORPORATION OF INDIA LIMITED

(A Government of India Enterprise) Registered Office: B-9, Qutab Institutional Area, Katwaria Sarai, New Delhi 110 016 Corporate Office: "Saudamini", Plot No.2, Sector-29, Gurugram, Haryana - 122 001 www.powergrid.in, CIN : L40101DL1989GOI038121

A Maharatna PSU

Yunus-i nübur jenti takum samatsür: Sheikh Hasina

New Delhi, Luchii/ December 05 (Agencies): Bangladesh ato kilonser Sheikh Hasina, shiba sorkar mapa nung quota asoshi temelenshi atema nüburtemi longkak aitba ajanga linük nungi jena oa tang New Delhi nung lir, lai ashiba agi Nobel sempet angur Muhammad Yunus-i aniba interim government-i "genocide" mapa inyaker.

"Tanü ni kin ajunga samatsütsü merang ta tai tonglokja lir. Asangsang nung iba mapa inyakba nung Yunus-i shilem agia arur saka dangari memetetsüsa renema lir. Iba genocide nung tasa yanglurji kaketshir ketdangsurtem aser Yunus lir," ta Hasina-i ashi.

New York nung sentong ka alidak virtual yimya nung jembidang Yunus-i Hindu nung densema kin tilatem kumzüka meyutet, ta lai aitsü. Lai jembidang ano International Society Of Krishna

Consciousness (ISKCON) lenir Chinmoy Krishna Das Prabhu apuba indanga olen ka shisema liasü.

"Hindus, Buddhists, Christians - shinga metoktsü. Tekülem ki-a rongdoktsü, temples aser Buddhist shrines tema raksatsü. Hindu nungeri longkak aitdang Iskcon lenir apu," ta Hasina-i ashi.

"Kin tilatem kechi atema reshikangshia amshir? Parnok kechiba tapi agi reshikangshia amshir aser merenshir?" ta lai Bangla oshi nung ashi.

Tesüiba ita ishika tsüngta Bangladesh nung Hindu nung densema kin tilatem dak amakba lendong atalokyonga arur.

Taoba hopta India-ia Bangladesh nung interim government yagi kin tila ajunga kumzüka ayutsüsa inyaksüla aser Hindu nung anema azüdokshi tali akumba atema tebilemtsü akar ta shia liasü.

Sorkar anema nokdaksü

ajungmesoa jembishinüba ken o nung apuba Das indang ken o ochishia obendangtsü imolar ta New Delhi ajanga ashi.

"Iba ken o nung ozü jenjang tejangja lir - interim government-i imlaba ama kin tila ajunga kumzüka ayutsüsa inyaksüla," ta MEA odongtar Randhir Jaiswal-i Hokulbarnü osangbener dang shia liasü.

"Azüdokshi aser rara ayongba tali akumba asoshi onoki süoki ia bilemer. Item ya media ajanga temloka jembiba ama mebilemtsüla. Kin tilatem wazüka ayutsü asoshi mera ajak agitsü Bangladesh dang maneni ayongzüker," ta pai ashi.

Yunus-i aniba interim government kumtetba sülen India aser Bangladesh tsüngta tesendaktep mejungi akum. Iba linük nung kin tilatem, talisa Hindu nung anema mapa tamajung inyakba asoshi India-i khuret lemsatepa arur.

(Maneni tapak 8 nung...)

Mulungnen



ASÜR LOLENKALA ASO : 1933 - ASÜ : 28.11.2024

Onoki teti meima aliba Ojala Asür Lolenkala Kangtsüng, Kibubai lemzüksüba anogo tempanger iba lima nungi pilaa aoba mapang medemer, kinunger, kiyonger, yimer, Arogotem aser Dimapur nung aliba Union balalatem shimokisa nübo, rongsen aser sarasadem agi yariogo nenok ajak dang pelaba lemsateper. Tulusang Tsüngremi teyariteper ajak moajangma.

~ Chirnur, Semchirtem aser Kinungertem.

Office of the MOLUNGYIMSEN SENSO MUNG DANG

P.O. Tuli, Mokokchung : Nagaland

TENÜNGSANG AGÜTSÜR

Molungyimsen Senso Mungdang-i Rev. B. Lanutemjen aser Rev. Onenlemla na jabaso Dr. Limasünep Jamir-i Dr. NTR University of Health Science, Andhra Pradesh nungi BDS, MDS (Department of Orthodontics and Dentofacial Orthopedics) renemba atema tenüngsang tulu agütsür.

Tsüngremi nü taküm aser wadang tali moajangma.

Sd/- N. Joseph Lemtur President

Sd/- B. Imsuinba Jamir Secretary

UNGMA IMPANG SALONG SEMCHIR

UNGMA, MOKOKCHUNG

TENÜNGSANG AGÜTSÜR

Ungma Impang Salong Semchir rongnungi Nagaland State kübok NPSC (CTSE) nung Sb. Katimong Jamir, Mr.R.Longritemjen Ao aser Mrs.Chungpongntula Imsongtsur jabasoi mezüng buba jenjang nung JE (Mechanical) Work & Housing Department kübok aser Kr. Nungshijungla Jamir Mr.M.Temsuwati Jamir aser Mrs. Asasula Longkumetsur jalai tanabuba jenjang nung (Pharmacists) Health & Family Welfare Department kubok takok konang tulu bener arutsüba asoshi asen Impang Salong Semchir ajaki pelaba lemsateper.

Asen Impang Salong Semchiri nenok taküm aser inyakba wadang ajak nung tajungtiba nung bendanga agutsur ochishia tenzüksü sarasadema atar.

Sd/- A. Matsungshiba Jamir Tatar

Sd/- B. Kilepchiba Jamir Tatar

Israel-i Gaza nung nübur ajunga samatsütsü meranger: Amnesty International

Gaza Strip, Luchii/December 05 (Agencies): Israel-i Gaza Strip nung Hamas anema raradang 'genocide' mapa inyakogo aser parnoki asaa Palestine nung samatsütsü merang, tongtipang ki o jen raksatsü aser chiyongtsü, mozü aser danga teyari oset bener aoba nokdang, ta Amnesty International ajanga tai tongloktsü.

Meimchir temeden asoshi nokdakba telok yagi Middle East indang osang ka Brehostibarnü sangdongba nung iba ama mapa ya Hamas-i October 7, 2023 nü Israel amakba kisüng masü mesüra civilian alidak telungpur aliba agi masü, ta ashi. United States aser danga Israel tembar linüktema iba inyakyim nung densema alitsü ta ashi aser nok-nü yokba anentsü ayongzüker.

"Onoki bushitetba ya alima asoshi saksalemtsü mapang ka asütsüla: ibai genocide lir. Ibai tangsa anentsüla," ta Agnès Callamard, Secretary General of Amnesty International ajanga report nung ashi.

Holocaust sülen kumtetba Israel-i 'genocide' ta tai tongloktsüba magizük aser ibai "antisemetic blood libel" lir ta ashi.

Parnoki International Court of Justice nung iba ama tai tongloktsüba anema ken o benoka lir aser International Criminal Court-i Ato Kilonser Benjamin Netanyahu aser pa indang taoba defence minister ajanga Gaza nung car crimes inyak ta aitsüba magizüki lir.

(Maneni tapak 8 nung...)

ICC Men's Player of the month atema Bumrah nominate süogo



Luchii/December 5, 2024

(Agencies): Australia den Perth nung mezüngbuba Test asayaba mapang kanga junga asaya-a innings ana nung wicket 8 agiba sülen Jasprit Bumrah, November ita atema Men's ICC player of the month asoshi nominate süogo.

Bumrah ya iba naroküm atema nominate asüba asayar asem rongnung ka lir, kong South Africa nung Marco Jansen aser Pakistan nung Haris Rauf nata densema lir.

Perth nung kanga junga asayaba sülen Bumrah taoba ita maneni ICC Test bowling rankings nung temaba jenjangi tuogo.

Bumrah-i mezüngbuba innings nung run 30 agütsür wicket pongu agiba aser tanabuba innings nung run 42 agütsür wicket asem agiba sülen pai rating points 883 angu aser Australia nung seamer Josh Hazlewood aser South Africa nung asayar Kagiso Rabada na ajateta liasü. Pai

rating point 883 anguba ya India nung fast bowler tem rongnung rating point timtiba anguba liasü. India nung spinner Ravichandran Ashwin (904) aser Ravindra Jadeja (899) nati dang point aika nguteta lir.

Bumrah taküm tang agi tasembenbuba temaba jenjangi tuogo. Pa February ita temaba jenjangi atu aser iba sülen ano October ita temaba jenjangi tua liasü.

Kasa mapang nung Jansenia, India den T20 asayaba mapang kanga junga asayaago aser iba sülen Durban nung Sri Lanka den Test asayaba mapang wicket tenet agia liasü. Iba asaya ya SA-i run 233 agi kokogo.

Mannei Pakistan-i Australia nung 2002 küm sülen November ita mezüngbuba ODI asayamung ka akokba mapa tongtimbang shilem agiba atema Rauf-a nominate süogo.

November ita atema ICC women's player of the month asoshi Bangladesh tsür Sharmin Akhter, South Africa tsür Nadine de Klerk aser England tsür Danni Wyatt-Hodge nung shimogo.

Junior Asia Cup akokba India team nem PM-i tenüngsang agütsü

Luchii/December 5, 2024

(Agencies): Men's junior Asia Cup akokba atema India hockey team nem Ato Kilonser Narendra Modi-i Brehostibarnü tenüngsang agütsüogo. Pai, asayatem dak sempet tajung keta aliba den meranga asayaba aser team ama ka kuma longjemer asayaba ajanga iba takok ngutetogo, ta ashi.

Pai X ajanga, "linük nungi hockey champions tem atema kanga nema adanger. India mens's Junior Team-i Junior

Asia Cup 2024 title abenba ya Indian hockey atema otsüsütsü mapang ka lir. Parnoki sempet tajung sayua asayaba den bendanga agüja aser team ama ka kuma longjemer asayaba ajanga iba takok ngutetogo," ta ashi.

Bodhbarnü Muscat nung final asaya nung Arajieet Singh Hundal-i goal pezü idaktsüba sülen defending champions India-i goal 5-3 agi Pakistan madak takok ngua liasü.

India team asoshi ano Dilraj Singh-i minute 19buba

nung goal ka idakja liasü.

Pakistan atema Sufyan Khan-i minute 30 aser 39buba nung goal ana idaktsü aser Hannan Shahid-i minute asembuba nung par team atema goal ka idakja liasü.

India Junior team-i iba asayamung ya tang agi pongubenbuba kokogo. India team-i iba asayamung ya 2004, 2008, 2015 aser 2023 küm koker liasü.

Iba asayamung ya COVID-19 wara poktetba ajanga 2021 küm masayai liasü.

India den tanabuba test atema Australia team sangdongogo

Luchii/December 5, 2024

(Agencies): Border-Gavaskar Trophy (BGT) nung India aser Australia na tanabuba test Adelaide nung asayatsü aliba atema Josh Hazlewood melena pacer Scott Boland shimogo, ta Australia skipper Pat Cummins-i metetdaksüogo.

Adelaide Test nung asayatsü aliba ya Boland atema ita 18 tsüngda Australia team nungi mezüngbuba asayaba asütsü.

Captain Cummins-isa, Adelaide Test nung ball aontsü atema Mitchell Marsh anema dang lir ta ashiba cricket.com.au-i metetdaksü. Boland tatemsa 2023 küm England den Ashes nung asaya liasü. Arishi küm 35 tain asayar yagi Hazlewood

melenogo, shiba Perth nung asayaba mapang yirua liasü.

Kasa mapang nung Marsh-a asayar 11 rongnung züngoksemogo. Pa teberem nung timtem ka adokba ajanga India den mezüngbuba test asayaba mapang tanabuba innings nungbo ball kanga sademabo monteti liasü.

Pre-match press conference nung jembiba mapang Cummins-i, team nung Scott Boland züngoksemba ya jangrademtsüka lir ta ashi.

Adelaide nung Test ya December 6 nü tenzüksü. Iba asaya ya day and Night test asütsü aser pink ball agi asayatsü.

Perth nung mezüngbuba Test run 295 agi akokba sülen

India team parnoksasa dak kanga temulung lemteta lir.

India team captain Rohit Sharma-a tanabuba test nung asayatsü renema lir. Pai ashiba agi, pa opener ama masü saka teyongtsü nung asayatsü. KL Rahul-i mezüngbuba test nung kanga junga asayaba sülen pa-a team nung züngosema lir aser pa opener asayadaksütsü atema Rohit-i pa jenjang meleshiogo. Team ajanzüksü atema iba telemtetba ya agiogo, ta Rohit-i ashi.

Tanabuba Test atema Australia team: Usman Khawaja, Nathan McSweeney, Marnus Labuschagne, Steve Smith, Travis Head, Mitch Marsh, Alex Carey (WK), Pat Cummins (C), Mitchell Starc, Nathan Lyon, Scott Boland.

Young Sports Personality award atema asayar asem shimogo

Luchii/December 5, 2024

(Agencies): Skateboarder Sky Brown, Para-swimmer William Ellard aser darts asayar Luke Littler nung BBC Young Sports Personality of the Year award atema shimogo.

Panel kati asayatem aika rongnungi asayar tajungtiba 10 shim, aser maneni top three asayar shimogo.

Iba tetushi agizüker ya December 17 nü BBC Sports Personality of the Year show nung live sangdongtsü.

Iba sentong ya BBC One aser BBC iPlayer nung 19:00 GMT nungi sayutsü.

Taoba küm snowboarder Mia Brookes-i iba naroküm ya agizüka liasü. La ya snowboarding nung world champion tem rongnung tanutsütila aküm aser Britain tsürtem rongnungi slopestyle akokba mezüngbuba asayar

aküm. Iba mapang la arishi küm 16 liasü.

Tetendangertem rongnung Paralympic gold medallist Sammi Kinghorn, Olympic silver medal-winning BMX freestyler Keiran Reilly, television presenter Qasa Alom aser Radio 1 DJ Jeremiah Asiamah aser Youth Sport Trust, Blue Peter aser BBC Sport nungi representatives tem densema alitsü.

Mezüng shimba asayar 10:

- * Mia Brookes (snowboarding)
- * Sky Brown (skateboarding)
- * William Ellard (Para-swimming)
- * Cat Ferguson (cycling)
- * Phoebe Gill (athletics)
- * Luke Littler (darts)
- * Abigail Martin (gymnastics)
- * Ethan Nwaneri (football)
- * Bly Twomey (Para-table tennis)
- * Iona Winniffrith (Para-swimming).

BENDANGLI OSANG : Tapak 7 nungi...

Yunus-i nübur jenti takum samatsür...

Hasina-isa ashiba agi, tebu Sheikh Mujibur Rahman ama la aser la tenu Sheikh Rehana tepsettsü sentong lir ta ashi.

"Nok-nü amer longkak aiterem Ganabhaban leni yok. Security guards temi injang khaloktsü asübo nisung takum jenti samar lila. Iba ya minute 25-30 mapa dang liasü, aser ni tashiyim agi ainshitsüsa aküm. Ni parnokdang (guards) kechi südir süaka injang makhaloktsütsü ashi," ta Hasina-i August 5 nü Dhaka

yutsür jena aotsüsa tensa aruba indang rasaa ashi.

Mujibur Rahman ya 1975 küm tepset.

Hasina-i ato kilonser menden nungi alutsüa mapang mangu aser azüdokshi anendaktsütsü nükjidadong nung August ita Bangladesh yutsür ajen saka azüdokshi manen ta ashi.

July aser August ita sorkar anema longkak aitba ajanga la Bangladesh yutsür jena aoba sülen India nung alir.

Israel-i Gaza nung nübur ajunga...

"Khenyongi agizüktsü makokba aser tejangraba aliba lokti tentet Amnesty International ajanga ano maneni tiazü report ka yanglu, koba ajunga tiazü aser tai lir," ta Israel indang Foreign Ministry ajanga sangdong ka nung ashi.

Iba rara tenzüksüsa amakba nung kin ajunga samatsütsü merang ta Israel-ibo Hamas dak tai tongloktsür, aser parnoki international law nung aliba ama par kumzuka ayur ta ashir.

Tai tongloktsüba ya timba human rights telok aser Palestine nung den tesendaktep tajung alirtem nungi timba lir. Saka taoba ita Pope Francis-ia Israel inyaksangshi yagi genocide den sako asü masüar bushisüngdangtsüla ta ashi aser Israel den tesendaktep

yanglutsü renema aliba sayua arusang Saudi Arabia indang crown prince Mohammad bin Salman-ia Israel-i genocide mapa inyaker ta aitsü.

Israel-i parnok ya Gaza nung aliba nüburtem den masü Hamas den rara nung lir ta ashir.

Amnesty yagi Gaza nung October 7, 2023 aser July ita tetenzüklen Israel inyakyim asadanga liasü ta ashir.

Meilongi Gaza nung Palestine nung timtemi aitsüsa Israel-i asaa mapa tamajung inyakra ngutet ta Amnesty ajanga ashi. Item inyakyim nung nisung aliba ki, farm, mozüki aser tajemtsü tzi agütsüba tesemtem raksatsüba, nübur ajunga ainshitsü totuyuba agütsüba aser humanitarian aid aser danga tongtipang services tem nokdangba dena lir.

BILEMDANGANG

"Temelenshi aginüra na tamasa melenshiang."